



Nuuk 11. februar 2015

Inatsisartut suleriaasianni §37 naapertorlugu Naalakkersuisunut imatut apeqquteqarpunga:

- 1. Inatsisilerinikkut akornutissaqarpa Nuna Minerals-ip aningaasat attortugaasa utertinnissaannut piffissaliussap sivitsorneqarnissaanut?**
- 2. Naalakkersuisut uppernarsarsinnaavaat aningaasaleerusuttumit isumaqatigiinniutaasinnaasumik tunniussisoqarsimasoq ullulikkamik 7. Februar 2015?**
- 3. Naalakkersuisut isumaqarpat Nuna Minerals annaanniarlugu allatut aaqqiissuteqarsinnaanermut periarfissat tamaasa misissorluarsimallugit, aningaasaliisut annikinnerpaamik annaasaqarnissaat siunertaralugu?**
- 4. Naalakkersuisut uppernarsarsinnaavaat Aningaasaqarnermut Ataatsimiititaliami Naalakkersuisut Siulittaasuata tusarniaaffigineqarnerani 9. Februar periarfissanik allanik saqqummiisoqarsimangitsoq?**
(Inatsisartunut ilaasorta q Naaja H. Nathanielsen, Inuit Ataqatigiit)

Inuit Ataqatigiit-nut pingaaruteqarpoq politikikkut patajaassuseq suleqatiginnikkusussuserlu avammut nittarsaatissallugit – tamannalu anersaaralugu Nuna Minerals pillugu suleqataaniarsimavugut.

Suleqatigiinneq ingerlalluassappat pisariaqarpoq paasissutissat agguataarneqartarnissaat kiisalu illuatungeriit aaqqiissutissanut assigiinngitsunut ammasuunissaat. Ingammik pisortat aningaasaataannut tunngassuteqaraangata.

Ajoraluartumik Aningaasaqarnermut Ataatsimiititaliami sulinitinni paasissutissat pisariaqartut tamaasa pissarsiarisinnaasimanngilagut, taamaattumik §37 Naalakkersuisunut apeqquteqarsinnaaneq atorlugu paasiniaavunga. Tamannalu ajuusaarutigaa suleqatigiinnginnermik takussutaassappat.

Kisianni akunnerit 24-it qaangiuppata Nuna Minerals akiliisinnaajunnaarsinnaavoq, taamaattumik iliuuseqarnissaq pisariaqarpoq. Nuna Minerals pillugu suliaq ajuusaarnartuuvoq, taamaattumillu pisariaqarluni pisut tamakkiisumik qulaajarneqarnissaat. Uagullu qinikkat pisussaavugut aalajangiisinnata paasissutissat pisariaqartut tamaasa pigalugit aalajangiisinnaanissarput.

Una suliaq nukingernartuummat neriuppunga Naalakkersuisut uku apeqqutit akiaarnissaat pingaartilluinnassagaat. Apeqqutit tamarmik "Aap"-pimik imaluunniit "Naamik"-mik akineqarnissaapput.